



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Biden jenjang ajungtsü atema Georgia electoion akoktsüla

TAPAK 10

NBA: Paul Westphal alima nungi pilaogo

VOL. XVIII NO. 80 (ADOK 80) DIMAPUR

TENTONÜ (MONDAY) AENJETI (JANUARY) 04, 2021

₹ 5.00

COVID-19 Nagaland: Nisung 11,930 nungi 178 anepaludar

Kohima, January 3 (TYO): Deobarnü Nagaland nung nisung ka dak COVID-19 aliba putet aser nisung 9 taneptsü nguogo.

"Tanü Dimapur nung nisung 1 dak COVID-19 aliba putet. Külén, nisung 9 taneptsü angu. Parnokji Dimapur o Phek nungi asemsem (3), Mokokchung nungi 2 aser Kohima nungi 1 lir" ta Health & Family Welfare Minister, S Pangnyu Phom-i metetdaksü.

Nagaland nungi nisung 11,930 dak COVID-19 putetba nungi 11,542 taneptsü nguogo, ta paisa ashi.

Tanü taneptsü angurtem züngsema Nagaland nung COVID-19 nungi taneptsü angubaji 96.74% lir, ta Minister Pangnyu-isa shisem.

Nagaland nung COVID-19 puteter nisung 79 tashi asü. Tasürtem rongnung parnok 69 coronavirus ajanga aser 10 tanga timtem ajanga asü, ta Health & Family Welfare Department Director, Dr Denis Hangsing-i metetdaksü.

Nisung 131 tashi tanga state temi ogo, ta paisa shisem.

District balala nung COVID-19 putetba: Dimapur (6,402), Kohima (3,713), Mon (603), Peren (502), Tuensang (244), Mokokchung

(179), Zunheboto (142), Phek (47), Kiphire (41), Wokha (39) aser Longleng (18).

Nisung 11,930 rongnung Traced Contacts 4,872, armed forces personnel 4,656, tanga state tem nungi arur 1,836 aser Frontline Workers 566 lir, ta Dr Hangsing-isa ashi.

District balala nung tang anepalurtem Dimapur (71), Kohima (62), Mokokchung (40), Peren (4) aser Kiphire (1).

"Tang anepalurtem rongnung parnok 20 dak shirangba yimya terara lir, ka kanga shiranga oxygen agidar aser 4 ventilator nung lir. Nisung 153 dakbo shirangba yimya kecha mali" ta Dr Hangsing-isa ashi.

Taneptsü angurtem: Dimapur (6,208), Kohima (3,601), Mon (592), Peren (498), Tuensang (243), Zunheboto (139), Mokokchung (131), Phek (47), Kiphire (39), Wokha (35) aser Longleng (9).

"Nagaland nung COVID-19 alitsü akok ta temulung melemi bilemba sample 1,20,626 tendangogo. RT-PCR ajanga sample 72,529, TrueNat ajanga sample 36,742 aser Rapid Antigen Test ajanga sample 11,355 tendang" ta Dr Hangsing-isa ashi.

omen nung ajemdaker inyaka aotsü, ta tenatisa metetdaksü.

"Gen. (Retd.) Niki Sumi-i anir NSCN/GPRN-i India sorkar aser Naga National Political organizations den yimjung maparen nung adentsü lemtetba PDA-i pelashishia agizüker. Iba ajanga Naga lennirtemi Naga tebilemtsü asoshi tatembang telemtetba ka agitsü jangraba kuli sayur. PDA-i sendaka alir ajak dang yimjung, terenlok aser telongjem atema longjemtsü ayongzüker" ta Chingwang Konyak aser Imna Along natisa ashi.

PDA-isa India sorkar dang 2021 nung Indo-Naga yimten tatem küma latettsü atema telok balala den olemtepba maparen tembangtsü mepishir, ta PDA Chairman aser Co-Chairman natisa ashi.

Centre-i Nagaland nung DAA agentsüla: NPF

Dimapur, January 3 (TYO): Centrer sorkari Nagaland ajunga nung ita trok atema Disturbed Area Act benokba atema jashir ta Naga People's Front (NPF)-i metetdaksü.

Naga yimten tebilemtsü atema kanga dang tongtipang süa jembiba mapang ka nung aser Naga public-i tatembang telemtetba ka agitsü imlaa aliba mapang ka nung Centre-i iba telemtetba agiba ya taoksatsüka lir aser iba ajanga Centre-i temulung magütsüba sayur, ta Press Bureau, NPF sangdong ka

nung ashi.

Centre-i iba Act benokba ajanga Naga yimten tebilemtsü atema nendaka meinyakba jungkai adoka sayur. Anungji NPF-i Centre dang iba telemtetba meyipa repringshitsü aser Act agentsü ayongzüker, ta Press Bureau sangdong nung shia lir.

"NPF-isa Naga nunger ajak dangi azükaru Küm Tasen 2021 salem abener aser küm tasen nung ayaokdang, asen loktiliba aser nübortem tsüngda temeim, anepalu aser azükaru lidaktsütsü imlar" ta Press Bureau-isa metetdaksüogo.

Dzukou nung mi ajanga square kilometer 10 shi rongdokogo IAF-i tzü litre 12,000 shiloktsüogo; Tensa azüoka lir



Kohima, January 3 (TYO) : December 29, 2020 nü Dzukou tzükong nung mi adokba sülen anogo trokbuba tashi nung square kilometer 10 shi rongdokogo ta Southern Angami Youth Organization (SAYO) tir Zakieletuo Tsükrü-i ashi.

Deobarnü Viswema yimtsüng nung osangbener den jembidang "Dzukou lenden nung oa alirtemi ashiba agi yashi tashi nung miji anüolentip tsütsü liasü saka tangbo anüolen tsütsü odar ta osang agütsüogo" ta Tsükrü-i ashi.

"Miji tang South-West tsütsü odar aser iba amai dang anogo ananü ronga ora Zeliang-Angami arrtsü atongtsü" ta paisa shisem.

Mi lendong ya December 29 anüngdang onoki metet. Kezotsa nungi nisung kar Dzukou valley-i aoba sülen mi ya adokba liasü. Iba osang ya Dzukou valley caretakers-i ashi, ta SAYO tirisas metetdaksü.

"Onoki osang angashiba sülen trekkers aputsü atema SAYO volunteers yok. Yimdaklirtemi nisung 21 angu ta ashi saka SAYA volunteers-i nisung shinga mangu" ta Tsükrü-i ashi.

"Nisungtemji Manipur kübok Kezotsa tsütsü jena ao ama onoki temulung malemer" ta paisa shisem. "December 30 nü Nagaland

Governor RN Ravi-i Dzukou valley semdangtsüba sentong liasü aser iba jagi SAYO volunteers nem mapa inyaktsü lemozütsü. Anepdang yakta onoki volunteers yoka mi lendong osang metetpela. Kasa anogo nung administration, Police, Forest Department, SAPO aser SAYO-i Dzukou valley tonga oa osang agitep aser idangji miji kilometer 2 shi nung kaoloker liasü," ta Tsükrü-i metetdaksü.

Iba sülen SAYO volunteers 200 aser NSDMA, DEF Kohima, 4th NAP Thizama o Forest Department nungi nübo 82 tashi December 31 nü mapa lemozütsü. Iba telok yagi January 1 tashi mi enseptsü meranga inyak.

January 2 nü NDRF nübotem aniok aser tang onoki ayong anasa fire line cutting exercise nung temulung agütsür, ta paisa ashi.

November 26, 2018 nü trekkers kar zübazülemba ajanga Dzukou valley nung mi lendong atalok aser iba sülenji Manipur aser Nagaland tsüngda MoU ka sign sütep. Iba nung state ana nung Dzukou valley-i aotsü atema lenmang ana dang amshitsü lemtet, ta SAYO tirisas metetdaksü.

January 2, 2021 nü Chief Minister of Nagaland, Medo Yhokha den DC Kohima aser SP

Kohima nungertemia lendong atalokba tesem semdanga liasü.

Iba mapang Yhokha-i core team ka tentettsü atema tebilemba ka shidangogo.

"Tanü Nagaland Police, Forest, NDRF, SDRF aser SAYO volunteers-i mi enseptsü meranga inyakogo. Iba mapa a SDO (C) Jakhama, SDPO South aser Range Forest Officer, Kohima nungertemi len anir inyak," ta District Forest Officer (DFO) Kohima Rajkumar M-i ashi.

Lendong atalokdak nungi osang tejanga metetpelatsü atema Kohima police-i Viswema yimtsüng nung Dzukou entry point nung control room ka lapokogo. Maneni, parnoki resting shed aser Dzukou base camp nung relay stations ana lapokogo.

Kohima Forest Division aser SAYO volunteers-i December 31 nü kilometre 5 talang fire line ka yangluogo. Ano January 1 nü SAYO volunteers-i kilometer 2 talang fire line ka yangluogo. Iba ya Dzukou lenden nung mi mekaolokdaksütsü atema inyak. Iba mapa nung Kohima Police aser State Disaster Response Force-i yaritep, ta DFO Kohima Rajkumar-isa metetdaksü.

"Mi aziüoka lir aser nisung telok tutu longjemmer inyakba ajanga lendenlen nung mi noktangteta lir. IAF helicopter temia tzü litre 24000 tashi shioloktsüogo" ta Rajkumar-isa ashi.

Dzükou valley nung mi lendong nung yariteptsü atema Indian Air Force (AIF) helicopter ajanga Bambi Bucket operations inyaker, ta PRO (Def) Kohima Lt Col Sumit K Sharma-i sangdong ka nung metetdaksü.

Iba mapa atema Dimapur aser Rangapahar nung Mi-17 helicopter 4 lemozüka lir, ta paisa ashi.

DNSU-i Dimapur railway station ajanga train mesenzüdaktsütsü

Dimapur, January 3 (TYO): December 16, 2020 nü osangkakettem nung Nagaland express train Ledo tashi belenba osang adokba nung Dimapur Naga Students Union (DNSU)-i ashishiteper aser parnoki iba telemtetba magienra Dimapur railway station ajanga train ka danga mesenzüdaktsütsü ta amokmerena metetdaksüogo.

North East Fronteir Railway (NFR)-i Dimapur nung masü saka Ledo nung ang train anentsü telemtetba agiba atema DNSU-i ashishia asüngdangogo.

"Northeast nung Guwahati sülen sen timtiba aazükbaji Dimapur lir saka NFR-i Dimapur station jenjang mejungi kümdakja iba ama

telemtetba agiba ya tim masü aser bendanga amshiba inyakyim ka lir. Ledo nungi senzüsenbongertem nüngdak tongtsütsü atema Dimapur Station nungi senzüsenbongertem temeten magientsüla" ta DNSU tir Sedevilie Angami aser Tongti Tezülar B. Mhajan Tsopee nati sangdong ka nung ashi.

"Tesüba küm 9 tashi Dimapur nungi Guwahati tashi Nagaland express train kanga dang junga senzüa arur aser metokmeperiiba onük kodanga madok. NFR-i tatemtsü atema onük kar ashibaji shitak süra, kechiba küm aika süia arudang item metokmeperi atema mapa kecha meinyak?" ta DNSU-i NFR dang asüngdangogo.

COVID-19 wara ajanga train


nung senzüsenbongertem ajema akümbaji Standard Operating Procedures (SOPs) kar latettsüba ajanga lir. Anungji ajaklen rongsenkettsüng tsütsü timtem ajurua aliba mapang ka nung NFR-i sen aika angutsü meimlatsüla, ta parnokisa ashi.

"NFR-i iba ama telemtetba tamajung agiba ajanga Nagaland nung sensotem aser talisa kaketshirtemi timtem ajurur, kechiyong aikati Airline service matur aser train nung dang senzür. NFR-i Ledo tashi Nagaland express belenba magizüker aser iba telemtetba meyipa magira Dimapur railway station ajanga train ka danga mesüidaktsüi noktangtsü" ta DNSU-i metetdaksüogo.

Tanü nungi DABA nung VBS tenzüker

Dimapur, January 3 (TYO): January 4, 2021 nungi Dimapur Ao Baptist Argo (DABA) nung "Rocky Railway" Vacation Bible School tenzütsü.

DABA Christian Education Ministry-i acha-ayanga Group VBS 2021 ya January 4 nungi 8, 2020 tashi agitsü aser taküm indang omenji "Yisu Tashi Ajanga Asenok Aniteter" lir.



COVID-19 wara ajanga nisung lokti adenshia amongtsü makokba agi taküm VBS ya DABA website nung virtual yimya nung dang anepdang shia 8:00 ako nungi tenzütsü.

Tesüba VBS tem ama taküma Beginner & Primary bible memory aser Junior & Intermediate bible story summary tetoktepbatem alitsü.

Dimapur tesem asem nung COVID-19 vaccine dry run agi



Urban PHC Duncan Basti, Dimapur nung January 2, 2021 nü COVID-19 vaccine dry run agiba mapang Deputy Commissioner Dimapur, Rajesh Soundararajan IAS den administrative aser medical ketdangsürtemi mita repranga aliba noksa ka yangi angur.

Dimapur, Aenjeti/January 03

(TYO): Linük ajunga den külemi Dimapur nunga tesem asem nung January 2, 2021 nü COVID-19 mozü agütsütsü atema 'dry run' sentong ka District hospital Dimapur, CHC Medziphema aser Urban PHC Duncan Bosti, Dimapur nung agia liasü. Honibarnü iba maparen ya linük tesem ajungalen inyak aser Nagaland atema Dimapur ya shimteta agi.

Dimapur nung iba maparen inyaktsü atema tesemtem ya Ministry of Health and Family Welfare ajanga totuyuba agütsüba ama takdang asem, waiting, vaccination aser observation rooms, nung amenoka agia liasü.

Vaccination team shia züngsem pongu liasü, aser yangi vaccinator officer ka den verification, mobilising for vaccination, portal uploading aser observation atema vaccination officer pezü liasü. Iba dry run agiba mapang tesem shia tajangzük angur nisung 25 shimteta iba maparen ya inyaka liasü.

Dimapur nung iba dry run maparen ya State aser District level nungi Mission Director NHM, Deputy Commissioner Dimapur, State Immunization officer, administrative officers, CMO team aser ano medical nungi ketdangsür aser danga department tem nungia arua ketdangsüa agi.

CMO Dimapur office nung iba inyakym indang shisalemsatop senden ka mena liasü, kong Mission Director NHM tekolak sür agi. Dimapur nung iba dry run sentong takok ngua agiogo.

COVID-19 vaccination atema dry run ya mozü anguba sülen nüburtem nem mozü agütsüba mapang metokmeperi majurutsüsa terenemshiba alitsü atema nükjidong yur agia liasü.

Mozü ngua amshiba mapang mezüng phase nung health care worker awajemtsü, tanabuba phase nung frontline worker aser tasembuba phase nung arishi küm 50 dang tainba nüburtem aser tanurtem densema iba mesük tashidak keta alirtem awajemtsü.

CBCMHK nung küm tasen benjong amung



Chakhesang Baptist Church Ministers' Hill, Kohima (CBCMHK) pur küm tasen benjongba mapang Theological Student temi ken atenba aser arogopuri tekülem ki temeket mürekmejuba noksa nung angur.

Dimapur, Aenjeti/January 03

(TYO): Alima ajunga den külemi Chakhesang Baptist Church Ministers' Hill, Kohima (CBCMHK) pura tekülem kidang "Come Let us worship the King" omen nung ajemdaker 2021 küm tasen benjongmung munga liasü.

CBCMHK indang Media & Publicity Committee ajanga sangdong ka nung ashiba agi, iba sentong agiba mapang pastor Rev. Dr. Wepre Mero ajanga

amangbapur dang terenemshiba den teimla, temeim aser Khristan yimya nung alitsü ayongzük.

Tashidak wara ajanga nisung meimchir jangratema takum aliba ajunga anendakja lir, anungji timtem balala tangatetba tajung nung agizüka nukla tuluba nung Tsüngrem anasai oa tekümtet bushitsüla, aser temang anema alitsü atema mera ajak agitsüla, ta Rev. Dr. Mero-i ashi.

Iba sentong nung theological student temi temeja ken ka aten aser Velhusalu Naro ajanga Lai azüng.

Mezüng anogo Tsüngrem asoshi mapa inyakba nung shilem ka ama CBCMHK ajanga January 2, 2021 nü CBCMHK, Lerie Sector Church, Hindi-Nagamese Fellowship aser The Light House Prayer & Worship Centre, Tekhuba nung mürekmejua ki-naro inokba agizüka munga liasü.

Kohima-Jessami 2-lane project atema ali kibur dang metetdaksür

Dimapur, Aenjeti/January 03

(TYO): Kohima-Jessami 2-lane project dak sendakba nung teraksa bener arutsüba atema Deputy Commissioner, Kohima indang office nung January 6, 2021 anepdang 9:00 ako nungi tenzüka ali kibur

nem temelen sen agütsütsü, ta Revenue Officer, Kohima, Keviletuo Nisa NCS ajanga sangdong ka nung metetdaksü.

Iba dak sendakba nung ali kibur tem tawa tangokba passport size noksa pezü (4)

den Aadhaar Card (Xerox)/ I.D Proof aser Bank Pass book (front page Xerox) bener tsüngdong arutsüla, ta ashi.

Ali kibur dak alaka dangar shinga nema senotsü magütsütsü, ta sangdong ajangasa metetdaksü.



OFFICE OF THE
DIMAPUR AO BAPTIST AROGO
DIMAPUR : 797112, NAGALAND
Email : daba@dabaarogo.org
DABA OFFICE NUNGI SANGDONGER

Temeim arogopurtrem, Yisu Khrista temeim salem den tepela küm tasen salem nenok ajak dangi DABA Office ajanga bener arutsür, aser 2021 küm asenok ajak asoshi Tsüngrem temoatsü talubosa ajangshiba küm ka südakjangma ta sarasadema nenok ajak moatsür. Ano yangi maneni nüngdak kar yamai lemsateper.

Asen arogo inyakym nung aliba ama Associate pastortem küm 5 term to jungogo, anungji 9th January 2021 anogo nung kiyong melenteptsü renema lir ajaki sarasadem nung yaritsü mepishir.

Tensa agi memelaba ajanga asenok lokti tekülem makateti mapang talangka lia aruogo, aikati tekülem menungraajembiba angashidang kanga pelaa bilemer aser Tsüngrem dang kanga sarasadema aruogo. Tensa tamajungba kati bentsür marura January 2021 nungibo lokti tekülem tenzütsü sarasadema sentong yangludagi. Koma aser kodang nungi tenzütsü mapang tatong nung metetdaksütsü anungji ajaki sarasadema atatsü mepishir.

2021 küm asoshi ABAM Women Ministry ajanga "Kibong Tekülem Asüngsashi" tetsürtemi agitsü ayungzükba sentong DABA Women Ministry ajanga Calendar nung atoker kibong shia dangi tenzüklateri lemyonga arudagi, aser iba sentong 5th January 2021 anogo nungi tenzütsü lir, kibong kar metongjemi lira nenoki kiyong nung tenzüklateri dang meshia ajaki shilem tajung agitsü mepishir 2021 January ita tekülem asoshi ken number agütsüja atar.

Anogo	Tetenzük Ken	Tatem Ken
2nd Jan. 2021 (Sat.)	155	166
3rd Jan. 2021 (Sun.)	2	186
6th Jan. 2021 (Wed.)	36	175
9th Jan. 2021 (Sat.)	130	108
10th Jan. 2021 (Sun.)	196	197
13th Jan. 2021 (Wed.)	200	179
16th Jan. 2021 (Sat.)	138	181
17th Jan. 2021 (Sun.)	6	126
20th Jan. 2021 (Wed.)	5	182
23rd Jan. 2021 (Sat.)	66	133
24th Jan. 2021 (Sun.)	11	144
27th Jan. 2021 (Wed.)	176	362
30th Jan. 2021 (Sat.)	145	308
31st Jan. 2021 (Sun.)	34	274

Lokti tekülem asoshi Tsüngremi mapang tajung ka yakta asenok nem bener arutsüsü, ajaki sarasadema atadi. Tsüngremi arogopur ajak kümzüka yujangma.

Rev. I. Wati
Pastor
Dimapur Ao Baptist Arogo

AR-temi Mon nung NSCN-IM züngsem ka apu

Dimapur, Aenjeti/January 03

(TYO): Assam Rifles temi Mon district nung NSCN-IM telok nungi overground worker (OGW) ka apu, ta sangdong ka ajanga ashi.

NSCN-IM indang overground worker ya Mon district kübok general area Phuktong yimtsüng nung

Hokulbarnü apu, ta Assam Rifles temi Deobarnü Twitter nung metetdaksü.

Iba mapang NSCN-IM telok nungi overground worker ket nungi sepaitemi .32 mm pistol ka den injang ngutet. Iba sülen pua alisang den pa ket nungi ngutetba osettem police nem agütsüogo, ta parnokisa ashi.

AR temi school tanur asoshi metzü meshiba tesem yanglutsü



Dimapur, Aenjeti/January 03

(TYO): HQ IGAR (N) kübok Assam Rifles, Mokochung Battalion ajanga Jordan School, Bura Namsang, Longleng District nung December 31, 2020 nü metzü meshiba tesem ka yangluja liasü.

Longlen kübok Jordan School, Bura Namsang nung Assam Rifles temi tetsür aser

tebur atema metzü meshiba tesemtem yanglutsüba ya, tesem tezülen yimtsüngtem nung aliba kakat reju nung kakatshirtem atema metzü meshiba tesem nungdak ta ajiteta mapa tajung inyaktsüba lir.

Iba ama mapa tajung inyaktsüba asoshi nüburtemi Assam Rifles dang pelaba lemsatepa liasü.



Manipur nung Churachandpur district kübok Tuilaphai yimtsüing nung sepaitemi KIA (T) (Non SoO group) telungpur ka apu. Sepaitemisa M-16 rifle 2, M-16 magazine 4 aser injang round 81 ngutet. (Imphal, January 23)

BJP aser UPPL longjemer Assam Assembly election nung tokteptsü

Kokrajhar, January 3 (Agencies): Honibarnü Assam minister Himanta Biswa Sarma-i, Bodoland Territorial Region (BTR) nung tang tagidak aliba Assam Assembly polls 2021 nung BTC nungi BJP aser külem sendaktepa alir telok United People's Party Liberal (UPPL) na longjemer tokteptsü, ta ashi.

Sikhnajhar Taekwando Gymnasium, Kokrajhar nung telok indang Kokrajhar district committee kübok BJP indang tenüingsang agütsüba aser telok senden ka nung adenba sülen, BJP-led North East Democratic Alliance (NEDA) indang convenor aser finance minister Sarma-i telok ana longjemer tokteptsü atema osang metetdaksü.

Osangbener den jembiba mapang, Sarma-i ashiba agi, UPPL den longjemer State Assembly polls 2021 nung tokteptsü asoshi onok tsüingda bangjemtepogo.

"Iba tesem indang lokti ajak dak tamang yua ochishishia inyaksü asoshi Pramod Boro-i

aniba BTC sorkar ajanga inyak tenzükogo," ta Sarma-i ashi.

"Hagrama Mohilary-i aniba BTC sokar mapang ochimashi inyakba maparen jenti atalokogo aser iba tesem nung scheme aser project tulutem amenokba dak sendakba maparen tsütsü BTC nung tang yimsü tesüdak aliba teloktep sorkari b u s h i s ü n g d a n g t s ü / asüingdangyatsü atema mapatong ka tenzüksü," ta paisa ashi.

Sarma, shiba state indang education minister lir, pai ashiba agi, "State nung HSLC aser HS tatidangtem May 11 aser 12, 2021 nü nungi tenzüksü."

Iba BJP senden, koba BTR kübok constituency 12 nung candidate tem shima toktepdaktaütsü asoshi telok asadanga jembio, iba senden nung Assam BJP president Ranjeet Kumar Dass, MP Dilip Saikia aser taoba mapang Rajya Sabha MP Biswajit Daimary nungeri jembio.

Iba senden nung Assam minister Bhabesh Kalita, MPs Pallab Lochan Das and Ashok

Shinghal, MLA Angoorlata Deka, ex-MLA Rekha Rani Das Boro aser tanga lennir tejentem dena liasü

Kasa mapang, state BJP-isa BTC chief Pramod Boro aser deputy chief Gobinda Basumatary naprongla nem tenüingsang agütsüogo.

Osangbener den jembiba mapang, BTC chief Boro-i "BTR nung ochimashi yimsü asüba maparen khenyongi melidaktsütsü (corruption-free governance) aser taoba mapang sorkari ochimashi inyakbatem asadangshitsü atema onoki tapet meratem agi tenzükogo," ta ashi.

"Taoba mapang sorkari achaayanga inyakba scheme tem asadangdar aser tang teinyakdak aliba project balala indang maparen ajak jangjashidar," ta pai shisem.

Himanta Biswa Sarma, shiba PWD minister lir, iba BJP senden temer sülen pai BTC auditorium hall nung BTC indang PWD ketdangsürtem den senden ka menogo.

Kiren Rijiju-i anir Assam MP Dilip Saikia nem tenüingsang agütsür

Guwahati, January 3 (Agencies): Assam nung Mangaldai constituency nungi BJP MP Dilip Saikia-i 'Best Active MP' anguba atema Union sports minister Kiren Rijiju-i anir party lennirtemi tenüingsang agütsüogo.

Fame India magazine-i Dilip Saikia nem 'Best Active MP' naroküm ya agütsü. Dilip ya Bharatiya Janata Party (BJP) nung national general secretary inyaker.

"Assam nungi MP aser BJP National General Secretary Dilip Saikia-i 'Best Active MP' anguba atema kanga pelar. Iba ya Assam aser North-East atema nüma atangba mapang ka lir" ta Union minister Rijiju-i ashi.

"Iba tarensen nung adentsü atema mapa junga inyaktertem dang zülüoker aser MP temi parnok tajungtiba inyakogo" ta Fame India magazine-i ashi.

"Telemsa 25 nungi MP 542 rongnungi tajungtiba 25 shimtsübaji mapa tasak asü" ta parnokisa metetdaksü.

Fame India magazine-isa telemsa balala nung best MPs

adoker ajak nem tenüingsang agütsüogo.

Assam nungi BJP lennirtemia Dilip Saikia nem tenüingsang agütsü.

"MP aser National Gen Secretary Dilip Saikia-i mapa tajung inyaktetba ajiteta 'Active' category nungi tematiba MP 25 rongnung densemba atema kanga nüma atanger. Pai kanga nendaka aser bendanga agüja inyakogo" ta Assam finance minister Himanta Biswa Sarma-ia metetdaksü.

Assam BJP president Ranjeet Kumar Dass-ia "Linük nung 'Active' telemsa nung MP tematiba 25 rongnung Assam nungi MP & National Gen. Sec. Dilip Saikia züngsemba atema tenüingsang agütsür. Pai nendaka aser bendanga agüja inyakba atema nüma atanger. Tarutsü wadang nung pa azükarudakjangma" ta metetdaksü.

"Akhümtsübua aliba MP & National General Secretary BJP Dilip Saikia nem tenüingsang agütsür" ta Assam parliamentary affairs minister Chandra Mohan Patowary-ia ashi.

Tripura nung BJP tali lemdanger

Agartala, January 3 (Agencies): Tripura nung Bharatiya Janata Party (BJP) sasep nung yaküm mepetmesü ka adoka lir aser iba khuret ya ano mangatetep lir.

Küm Tasen tenzükli state lenisüba nung temulung masürtem rongnungi BJP MLA Sushanta Chowdhury-i BJP state committee nungi anenogo.

January 1, 2021 nü pai BJP state committee nungi anen.

Anogo ishika tejaklen temulung masüba MLA temi senden ka amen aser idanggi chief minister aser BJP lennir Biplab Kumar Deb agientsü atema takhangba agütsü.

Sorkar ya nisung kati dang yimsü asür aser iba ya anentsüla ta Chowdhury-i chief minister aija jemb.

2018 Assembly Election sülen BJP toktsür CPI-M nung adenertemi party nung akhüm

aser tetushi angur, ta paisa ashi.

"State committee lennir telok kati onok anema mapa inyaker aser iba ama tensa ka nung ni mapa inyaka mouteter" ta Chowdhury-isa ashi.

Hokolbar nikongdang osangbener senden ka nung pai BJP state committee nungi anenba osang metetdaksü.

State lennirtemi Majlishpur Mandal nung tir Gouranga Bhowmik mapa nungi anentsüba sülen anogo ka lir Chowdhury-i iba osang metetdaksü.

Chowdhury aser Bhowmik na ya tesentaktep tajung lir aser party anema inyaktertem rongnung Bhowmik dena lir state party lennirtemi ashi.

December 31, 2020 nü state party lennirtemi Majlishpur Mandal tir menden nungi Bhowmik agien aser pa melena Sumit Chakraborty shim.

Tripura nung tesayur ka pa sasa taküm agi



Agartala, January 03 (Agencies): Tripura nung mapa nungi anentsür aliba tesayur ka tejashi nung pa sasa soset. Tasüsangji Uttam Tripura ta jangjaogo.

Uttam-i Hokolbar aonung pa sasa taküm agi. Pa ya Tripura district kübok Rajnagar tesem nungi liasü.

Uttam sosetba atema tekashi tejashi nung pa kinungtsüia sosettsü merang, saka kiyongertem aser lar



kinungertemi la nokdang.

Uttam Tripura ya primary tesayur ka liasü aser Supreme Court tetuyuba ajanga tesayur 10,323 mapa nungi anentsür rongnung pa densema liasü.

Rajnagar police station kübok Wanchang yimtsüing nung Uttam-i par tsürabur, kinungtsü aser tanur ana toktsür pa sasa pa tekong nung lisü agi alentset.

Par tsüraburi ashiba agi, "Kibong nung timtem balala aliba ajanga 'Madhyamik'

examination nung takok anguba sülen, Uttam-i aayanger ka ama inyak. Iba sülen 2014 küm Primary School ka nung tesayur inyaksü asoshi pai mapa angu."

Yaküm (2020) April 1 nü mapa nungi anentsüba sülen, kibong mesütsü atema tanga mapa kecha mengutetba ajanga senotsü tsütsü Uttam-i timtem tullu ajangshi.

Iba den külemi kibong mesütsü atema pai loan agi aser item loan motet.

Honibar anepdang, Uttam'er adianutemi pa aletseta sür lia angu.

Iba lendong ajanga mapa nungi anentsür alir tanga tesayurtem aoksadok. Tesayurtem ya parnok mapa tanaben meshitsü asoshi December 09, 2020 nü nungi tenzüka longkak aittar.

Honibarnü item tesayur yagi Uttam Tripura nem akhüm agütsüogo

DEBTS RECOVERY TRIBUNAL, GUWAHATI
Government of India, Ministry of Finance
Department of Financial Services (Banking Division)
Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007.

NOTICE OF DEMAND TO THE CERTIFICATE DEBTOR (S)
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)
D.R.P.C. No.3172/ dated: 17.12.2018
State Bank of India, SARB, Jorhat Branch
-VS-
M/s Nature's Glory Departmental Store & Ors.

To,
1. M/s Nature's Glory Departmental Stores, IZ Complex, 3rd Mile, P.O. & P.S. Dimapur, Nagaland, Pin-797112.
2. Smti. Helis Karki, Proprietor of M/s Nature's Glory Departmental Stores, C/O- Christopher Karki, I.Z. Complex, 3rd Mile, P.O. & P.S. Dimapur, Nagaland, Pin-797112.
3. Smti. Helen Sumi, D/O- Phushitto Eptho, House No.5, Thilixu Village, 3rd Mile, P.O. & P.S. Dimapur, Nagaland, Pin-797112.
This is to certify that a sum of Rs.13,36,136/- (Rupees Thirteen Lakhs Thirty Six Thousand One Hundred Thirty Six only) as per details given below has become due from you consequent to a Recovery Certificate issued by the Ld. Presiding Officer by an order dated 01.11.2018 in case O.A. No.223/2018
1. Amount due as per the Recovery Certificate: Rs. 14,07,09.81
2. Interest from 05.06.2018 to 31.03.2019 @12.45% P.A. Rs. 1,29,061.19
3. Costs Rs. 16,000.00
TOTAL Rs. 15,36,121.00
Recovery (-) Rs. 19,99,985.00
Rs. 13,36,136.00

2. You are hereby directed to pay the above some within 15 days from the publication of this notice failing which the recovery shall be made in accordance with provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.
3. In additions to the sums aforesaid, you will be also liable for
(a) such interest as is payable in accordance with the recovery certificate (DRPC No.3172/2018) for the period commencing immediately after issue of recovery certificate to the date of realization, and
(b) all costs, charges and expenses incurred in respect of the services of notices and of warrants and other processes and proceedings taken for realization of the dues.
GIVEN UNDER MY HAND AND SEAL ON 7th DAY OF DECEMBER, 2020.
Recovery Officer
Debts Recovery Tribunal, Guwahati.



TIR YIMYIM

YIMOBILEM (EDITORIAL)

DIMAPUR TENTONÜ, AENJETI (JANUARY) 04, 2021

TERATA NUNG TENZÜKBA KÜM

Tetsübutüsü tashidak agi yaküm küm piyong amokmerendakja arur küm tasen ka tongtetdaksü nungji, Tsüngrem nungi asenok ajak taochi tulu nguogo ta bilema pelateptsü tim, iba jagi asenok rongnung Tepela Küm Tasen salem shiteper. Atangji, küm tasen ka den ajuruteptsüba tepelatsü saka küm tasen songtema aotsüba mapang, anogo aser asen takümü asenok ket nung mali. Ano, taküm küm ya balaka alima nung Covid-19 tashidak wara ya tesamar masü saka tesashiba-ang poktetba osang angashir, iba jagi asenok dang masü saka alima nung talir temang kanga terata nung 2021 küm ya tenzüker. Iba tensa tia ya kodang bilemdangdir, alima nung meimchirtem Tsüngrema mali ama, saraademsüa mapang mangu, kanga aritepa oa aliba mapang ajungbena ka anendaksüba mapa ka lir ta angatetter. Aji oda, asenok dak tashitemetet lira aser asenok ket nung rongsen peria kara, asenoki tashidak ajak kokteta kodanga masütsü amai bilemer. Ajisüaka, asenoki Covid-19 agi tangar takütem samabajibo yutsür, takoktet medical doctor dena sür asüpila sentep magitetbajibo toktsür taremdaka maka bener jajaba angashiogo aser tangua nguogo. Asenoki asensasa tuluka bilemakasa asen takümü aji lir. Iba amaji tangar dak timtem toudhi aser mangyim jashi agi atongdang, asenoki asenok dakbo matongtsü amai bilemer, saka manger mesangwa dang asen daka kechi ataloktsüar aseni ashitsü makok. Iba taküm tiaji kodang bilemdangdir, terata nung tenzüka kümji taküm 2021 küm kisung ya masü saka küm, ita aser anogo ajakji kodang komaka nung atemtsüar asenoki memetet terata nung tenzüker. Iba jagi Lashiba, Habakkuk tapu 2:4 aser Rom 1:17 nung ashir, "Teindang nisungtem tamang agi alitsü." Tetezü, Tenüngsang Ken 37:3 nung shia aliba ama, "Kibuba dak amanga, tajung – tajung dang inyakra alima nung asenok nungdak ajak ngua jangratema alitsü. Aji oda, alima nung tashidak wara tamajung liang teli, lendong arung taru, saka asenokbo meratai Tsüngrem dak dang amanga tajung tajung inyaksüba Laishiba tesayuba lir. Ajisüaka, asenok dak mangatet aser tamashi shisatsü kaji, asenoki tang ama tashidak aser alima lendong tsüba terata nung alidang, tajung inyaksü memulunger. Asenok dak tangatetba lira, tajung inyaksüba mapang tajungtibaji tang ama mapang tamajungtiba mapang ya lir. Aji oda, kodang asenoki Tsüngremi asenok nem angatetdaksünüba shisatsüji angatetdir, asenoki kodanga meratatsü. Atangji, Khristan taküm ka atema tamajung inyaksü atemabo teratatsüka saka tajung inyaksü atemabo kecha teratatsü mali. Alima nung ya asenoki kechi prokdir, ajisa arotsü ta asenoki meteta lir. Tetezü asenoki tajung tajung inyakra, tajung tajung ajurutsü aser tamajung inyakra tamajung ajurutsü. Ibaji Alima nung Tsüngremi inyakyim (natural law) lir. Covid-19 wara liang teli, asenokbo mapa tajung inyaksü nung meratali. Ashiko, alima tensa mapang majung akümba agi, nisung aika mapa maka kümer, chiyongsüa maka, tanurtem kaketrejuia meyoctet, shiranger saka mozü süngjang ka alia mechitetba kibong aser nisungtem aika asenok anasa alitsüa akok. Aji oda, mozü kitem nunga asenoki yaritettsüsa mapa karbo alitsüa akok. Item asoshi asenoki tajung langkabo inyaktettsü. Ibai tashidak tsüba teni tebang sü (mask) agi nembanger kechalenia mao aser shinga dena majurute asen kija kumzüksü bilema kazüba mapang ka masü. Teni tebang, nungdakra teben dena, sü agi nembanger asenoki tangar asoshi kecha meratai mapang tajung aika inyaktettsü. Aji oda, lokti külemi inyaksü mesademyonga asen alidak asen temeket nung asen yimer mesüra ase kiyong aser yimti ajungtsü asoshi mapa tajung aika asenoki inyaktettsü. Joko, alima nung tashidakbo poktetpet poktettsü, anungji ibai tashidak tsüba kidang amongba putu masü. Asenok joko temang aser tanüla asoshi nungdakba sübotsü sübor, kecha meratai tajung tajung inyaka aotsü tenzüka kümji, shitakba agibo, 2021 küm ya asütsüla. Tashidak tasen aser metongdang aser lilang osang onsara tesashi asüba agi, yaküm 2020 küm piyong Covid-19 tashidak tsüba pei kinunger aser medemertem dena sadema meyaritepteti aruogo. Atangji, iba jagiang asenoki tashidak nokdangtetogo ta bilemdi, kechiyong Covid-19 tashidak ya tiyazü masü shitakba lir. Joko, tangbo asenoki asen temang koma anepalutsü aser tashidak wara koma nokdangtsüar meteta kümogo, anungji iba inyakyim nung lia asenoki tangar yaritettsüsa asenok alitsüabajiang ajak atema kanga tongtibang kümogo. Aji oda, asenok ratatsüba masü saka akhi alu mapai otetang toutet, kaketrejuia otetang toutet, asenok anema ali tashibo, Tsüngrem dak dang amanga tajung, tajung inyaksüba asen mapa asütsüla. Iba jagi dang Covid-19 wara yaa akoktsü.

OLEMSABANG

KÜM TASEN TAYONGZÜKBA: MEZÜNGBUBAJI MEZÜNG SÜDAKJANG

~ Tiatoshi Longkümer

Okila: Mapang-mapang nung asen Naga kin balala longjemer senden alidang khen-khensa nia sarasademtsü jaoker. Sarasademtsü maongka nung senden nung adendang kin balala lenirtemi tebilembatem lemsatepba angaa amener. Tejembir aikati kanga shisa kaa jembiteter. Item rongnungjia asen Aoer lenirtemi jembiba O-temji kanga tajung aser tesangraa lir. Aser yamaji, tanga kintemi asen Aoer lenirtemi jembiba o temji kanga ladanga angar.

Asen Kin Lenirtem dang Tsüngrem Akhümtsübuba Samar:

Ni adenba senden teimba ka nung asen Aoer lenirtemi jembiba aser tangar kin lenirtemi jembiba tepilaji, Tsüngrem akhümtsübuba jembiba (God consciousness) ya lir. Naga kin tila-tulu lenir teimbai Tsüngrem kanga akhümtsübuba jembir aser yamaji alima onüktem lemsatepyonga Tsüngrem indang khuli süa aser Pa akhümtsübuba okilar. Asen Aoer lenir mesüra yimsüsür aikati kanga ngasangatema aser asenok tangar kin dang nungi tashiba aser temetetba amai jembishinür. Mezüng Khrista osang agizüka sangdongba kin sür nung asenok aikati tangar kin den yimten yimli jembishinüadang Tsüngrem akhümtsübuba jembiba yimya kanga achema akümer. "Asen Aoer-i kechi ashir ta tangar Naga kintemi atar" ta bilemba tejen asüküm shisatsü tu ano asenok aika dang aliba yong, asenok lenirtemi Tsüngrem nungi shisatsü bushiba achema lir.

Tanü Putu nung Asen Ao Kin Meinlokba Tera

Atangji, asen Ao kin ya asang-sang nungbo Tsüngrem akhüm metsübuba kin/lokti ka kuma odagi. Küm tasen ka tenzükdang asen Ao kin lenirtem aser yimsüsürtemi anir Tsüngrem akhümtsübuba (God consciousness) shisatsü ka nendaka bushitsü kanga nungdaka lir. Ya roka-soa meinyakra asen kin khobi mele tangar sülen anidaktsü. Tanü putu ya tanga Naga kin, tila-tulu ajak kanga ainba mapang ka lir. Asen Ao kin tejenba putu nung Tsüngrem taochi ajanga shisaliok aser tamangba mezüng maongka ngua kanga ain, saka taoba putu nung ainba sülenbo asenok kangabo meinloker. Aser tanü putu nung asenok meinlokba tera tongtibaji, asenoki Mezüngbubaji Mezüng Mesüdangtsüba ajanga lir (First thing First). Mathi 6: 33 nung yamai zülua lir: "Saka tamasa nenoki Tsüngrem yimli aser pa temeshiba bushiang, aser item ajak nenok nem bendenloktsütsü."

Küm Tasen nung Asen Tongtipangtiba Teinyaktsü:

Küm tasen ka tenzükdang taküm nung nisung shia teinyaktsütem jenti lir. Ajakji taginütsü tesa saka ajak-a tajangzük masü (1 Kor. 10: 23). Taküm nung mapa kar rongdak-nungdak (Urgent) lir, kar aritepa inyaksüba (emergency) lir, kar kanga tongtipang aser rongdak (important and urgent) lir, kar tongtipang saka kanga maritepyonga ajungtsüa lir (important but not so urgent), aser karbo tongtipanga masü aser meinyakyonga kecha masü ta lir (not so important and avoidable). Ne mapatemji koba kanga tongtipang aser koba metongtipang itemji tarensena shima aser shisadanga inyaksüla. Tatishitsü agi, Kin-kidong otsü jembiba agi kidang mema melidaktsüba aser sentep-senshi aotsüa atsüayongdakjaa lira, itemji nai khen achema kümdaktsüyonga tajungba dang. Ano na Second-hand dokan nung mapang endoka senzüba ajanga ki mapa aser tekülem sentep nungi piladakjaa lira, item dokanem nungi khen anisungzük agiyonga tajungba dang.

Meimchir taküm shia nung tongtipangtiba (important & urgent) shilemji Tsüngrem Yimli aser Pa temeshiba bushiba ya lir. Khrista akar aser maker ajaki Pa yimli aser Pa temeshiba yabo bushitsü nungdaker. Kechiaser Tsüngrem o jagi ashir, nai iba ya bushiteta yura tanungba asen nungdak ajakji ne nem bendenloktsütsü.

Küm tasen ka tenzükdang, ne taküm nung nungdakba aika dang alitsü. Kija-kibong aser lokti ajak nung teinyaktsü agi sünga lir. Saka item nungdak ajak tema nung, asen teinyaktsü tongtipangtiba, Tsüngrem yimli aser Pa temeshiba bushitsüba ya lir.

Tebushiri Anguba Yimli aser Shisatsü:

Shir takümi anung-akonga aser meperia ta bilemer parnoki bushijen bushia alir. Shir sensaka alir parnoki mapang ajak nung yimlaseta aser bushia alir. Yamaji, shir takümi Tsüngrem yimli aser pa shisatsü bushia alir parnoki kotak yimli aser pa shisatsü ngutetsü. Mathi 5: 3 nung ashiba amato, "Tanela nung anünga alirtem temoatsüba kechiaser Kotak yimli parnok meyong." Saka shiri tanela nung peria lir ta bilemer parnokji tanela nung asükümeritem lir, aser iba tatidang ya koktettsü kanga meita alitsüla.

Laishiba nung shisa takatiba chubaji Solomon ta shia lir (1 Chubatem 4: 30). Solomon-i pei nübur madang yimsütsü asoshi Tsüngrem dang shisatsü dang meshi. Solomon-i inyakba nungji Tsüngrem kanga temulung achi nung Tsüngremi pa nem shisatsü dang masü saka rongsen aser tenüngsang-a agütsü. Asenok lenirtem asoshi yangi tangatettsü tongtipang ka lir. Solomon shisa makaba agi pai Kibuba dang shisatsü meshiba masü, saka pa shisa akaba agi pai shisatsü dang meshi. Kechiaser shisaa akari shisatsü bushir, aser temetetba alirtemi tali metetnür. Daniel 2: 20 & 21 nung yamai shia lir: "Teti tatem maka Tsüngrem tenüng temoatsü sang; kechiyong shisatsü aser tashi pa meyong lir. Pai mapang aser tsüngküm lemsatsür; pai chubatem agiener aser chubatem mendaktsür; shisakar nem pai shisatsü agütsür, aser tangatetba pur nem pai temetetba agütsür."

2021 küm tasen tenzüka aodang, asen Ao kin nübur shiai Tsüngrem dang shisatsü meshia tenzükd. Alima nung ajak kar mesüra ajangzüker külen shisatsü makara asenok tangar menüdaktsüba jiloshi aieritem dang akümtsü. Saka shiri Tsüngrem nungi shisatsü aser ajemaluba senmang agizüker parnoki alima senmang amangtsü. Süra, shisatsü ya asen dangi koma arur? A. Shin 9: 10 nung yamai shia lir, "Kibuba tsüububaji shisatsü tetenzükba aser Temeshisang metetbaji tangatetba lir." Atangji, shisatsü aser tangatetba ajakji Kibuba akhümtsübuba nungi tenzüker.

O tembang:

Tang nungi shirbo asen kin yimten yimsüsür aser arogo aser lokti lenirtemi anir nütsüng nübur ajaki asen tebilemba nung, asen jembishinü nung, aser asen inyak-sangshi ajak nung Tsüngremji mezüngbuba südakjaa amshidi. Asen tenüng mesüra kin melena Tsüngrem tenüng enokdi. Aseni shisadanga ajak nung tetenzük aser tatembangji Tsüngrem südaktsüdi. Asen jembishinü aser zülubanglu ajak nung okila aser O tembangji Tsüngrem südaktsüdi. Süra Kibuba Tsüngremi asenok dang taochi sayutsü aser asen kin nem shisatsü aser bangdak moatsütsü. Mezüngbubaji mezüng südakjang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Turkey nung Armenia nunger Tenla ki ka Cultural Center akümtsü



Konya, Turkey nung aliba Holy Trinity Armenia Arogo Tenla ki noksa nung angur.

January 03, 2021: Turkey linüki Konya nung aliba Holy Trinity Armenian Arogo Tenla ki ka cultural center ama yanglushia amshitsü atema telemtetba agia liasü, ta International Christian Concern osang ajanga metetdaksü.

1915 küm Turkey linük nung Armenia nunger Khristan jenti tepset aser Khristan yimsü samatsüsa liasü. Iba mapang nungjagi tenzüka Turkey linüki Khristantem Tenla ki aser Armenia nunger cultural sites aika agiadok.

Khristantem jenti tepsetbaji Turkey linükibo menanzükür aser Khristantem meyong Tenla ki asentenshia yanglutsütsü atema sorkari meinyaker saka item Tenla kiji mosques küma yanglushir amshir mesüra tourism kiojen kümdaktsür.

Iba Tenla ki cultural centre ama yanglushiba nung tang tashi nung sen million 3.5 indokogo.

Raymond Kevorkian-i züluba kaket "Armenians in the Ottoman Empire Before 1915"

nung shia aliba agi, 1915 küm tashi nung Konya Aksehir nung Armenia nunger Khristan 4,950 shi liasü.

Surp Yerrortutyun ta ajaba Tenla ki ya 1859 küm yanglu aser kasa district nungsa Armenia nunger shisaliokreju-a pezü liasü. Item school rongnung Surp Istepannos School bo province ajak nung kanga nüngtugu liasü. Iba district nung Armenia nungerji shiküp yangluba, carpet atakba aser in atsüngba mapa nung kanga nüngtugu liasü.

Pakistan nung Khristmas anogo nung Khristantem anema inyak

January 03, 2021: Pakistan kübok Lahore yimti nung Khristmas anogo nung Muslim nungeri Khristan tsürtem amokmeren aser Khristantem aika yirua liasü.

December 25, 2020 nü Lahore kübok Khadim colony nung Khristantem Khristmas sentong nung adentsü atema Tenla kidang adenshiba sülen moapu nung sentong agitsü lia Muslim nunger 15 aru aser Khristan tsürtem mesüshi

tenzük. Muslim nunger jagi tetsürtem noksa tangok aser parnok indang phone number meshi.

Ib osang angashia nisung ka tenüng agi, Faisal Masih iba tesemji tonga aoba sülen Muslim nunger dangji tetsürtem amokmeren tesü, ta mepishi saka parnoki Khristantem anema yimyim ayim aser pa dak azük.

Iba sülen tanga Khristantemia joko

maremzükteti parnok den raradang maneni Muslim nunger telok ka arua Khristantem dak azük.

Khristan tenet mejungi yiru aser Khristantemi aibelenertem rongnung pa pua police ket nung agütsü saka police-i idangyongjisa chiokadok.

Khadim colony nung Khristantemi aibelenertem anema FIR ka benokogo, ajisüaka tang tashi police-i aibelener ka danga mapu.

Covid wara mapang nung Laishiba jenti yokogo: Lifeway

January 03, 2021: Coronavirus wara liaka 2020 küm alima tesem ajungalen Laishiba jenti yokzükogo, ta Lifeway Christian Resources osang ajanga metetdaksü.

Lifeway Christian Resources report ajanga ashiba agi, 2020 küm April ita nungi June ita tsüngda Laishiba aika yokzükogo.

Lifeway CEO, Ben Mandrell-i, 2020 küm Laishiba aika ayokbaji, coronavirus wara mapang nung nisungtemi teimla aser taneptsü bushiba ajanga asütsüa akok, ta ashi.

"Iba ya odangbo masü, kechiyong nisungtemi timtem tensa mapang nung teimla bushia Laishiba bushir," ta pai ashi.

"Timtem mapang nung nisungtemi teimla bushia Laishiba azünger, kechiyong asenok timtemba mapang nunga Tsüngrem lir ta asenoki amanger. Laishiba ya Tsüngrem O, aser asenok timtemba mapang nunga Pai asenok mesendoker," ta pai ashi.

1891 küm Lifeway ya tenzüka liasü, aser iba küm nungjagi tenzüka parnoki Laishiba, kaket balala, Lai o teratet kaketterem, tanurtem kaket, osangtajung kentem aser Arogo dak sendakba kaketterem ajanga ministry mapa inyaka arudar.

2019 küm January ita nung Lifeway-i parnok meyong dokantem aika shibangtsü aser

online ajanga ayokba nung taliba ranglochtsü, ta sangdonga liasü.

2020 küm April ita nung LifeWay Christian Resources- isangdong ka ajanga, 2019 küm hopta ka nung kaketterem ayonba den medemdangra 2020 küm hopta ka nung Laishiba ayokbaji shilem 62 agi timba liasü, ta metetdakja liasü.

Ano Laishiba publisher, Alabaster Co.-ia, 2019 küm den medemdangra 2020 küm Laishiba shilem 143 agi timba yokogo, ta metetdaksü.

Maneni Christian publisher, Tyndale House Publishers-ia 2019 küm March ita nungi tenzüka 2020 küm March ita nung Laishiba jenti yokzükogo, ta metetdaksü.

ANOGO ABEN TSÜNGREM DEN

Kechiba shisabulur?

Filipi 4: 4-7

Asenoki aiben yimkong tsükchir ta jembir. Yimkong tsükchirji shirnok? Shisabulubaji kija shiai anogoshia ajuruba tsükchir tulutiba lir. Ajak tsükchirji shisabulubaji lir.

Asenok ajaki shisabulur. Kari tali shisabulur. Tejangja, shisabuluji meimchir yimya senmang ka lir. Teyongyaba, akangalonga maliba, aser tetsükdak ajak jagi shisabulu adokdaktsür. Iba den Laishiba nung ashir kecha nunga temulung tatema.

Ibaji jembitsü temüla, saka akoktsü tasak. Shidakba nung asenoki asenok sasa ibai mokoktettsü. Tanü lesson nung Tanabubaji reprangdang... saka ajak nung sarasademba aser mepishiba aser tenüngsang agi nenoki meshiba Tsüngrem nem metetdakjang. Aser Tsüngrem tesünep kobai tangatetba ajak atentanger ajagi Khrista Yisu nung nenok temulung aser tebilemba nüka alitsü. Anungji, kechiba shisabulutsü?

Ya bilemdangang: Tang nai ajuruba shisabulu tulubaji kechi? Nai iba tebilemtsüji Sarasadem nem agütsür asü?

China nung Khristmas anema longkak ait; Tenla ki shibangtsü

January 03, 2021: Khristmas Fujian Province nunga mapang China linük tesem kar shopping mall ka nung nungbo sorkari pusema Khristantemi Khristmas ken Khristmas anema longkak ait, atenba mapang nung police-i ta osang ka ajanga nokdanga liasü.

Bitter Winter osang ajanga ashiba agi, December 28 nü Khristantemi timtem kanga ajurua liasü; yimti ka nungbo Khristmas anema longkak aitertemi China nunger wako den "Christmas, Get Out of China!" ta ozülü amer longkak aita jaja.

"Item sentongji China Communist Party (CCP)-i melaba dang masü saka parnoki asalentong yanglua inyakba lir; yamaji ka mesüra longkak aitertemji idangyongjisa puadokla," ta Bitter Winter-i metetdaksü.

China sorkari sensotem dang coronavirus tongbang kokogo, tabo sangdonger ajisüaka sorkari coronavirus wara tenüng amer Khristmas mapang Tenla kitem shibangdaksü. China yimtiba, Beijing nunga St. Joseph Arogo Tenla ki kima sorkar ketdangsertemi Khristmas süngdong ka ayu, ajisüaka Khristantem Tenla ki telungi meidaksü.

China kübok province aika nung osangbenertemi, Khristantem atema taküm (2020) Khristmas-sa tamajungba liasü ta ashiba Bitter Winter nem metetdakja liasü.

Alima tesem ajungalen Khristmas benjung mapang nung China sorkar tajangzük kanga angur, kechiyong US aser Europe nung Khritmas benjung sobutsü shilem 80 bo China linük nung yanglubatem alizükba lir.

"China nung Khristmas nokdangtsü atema Communist Party-i coronavirus wara tetshir, ajisüaka China nung yangluba benjung sobutsü balala anüdoklen aliba linüktem dang ayokba ajanga parnok kanga tajangzük angur," ta Bitter Winter-isa metetdaksü.

OLONG PAITEP # 5683

1			2			3			4	
			5		6		7			
8										
			9							
	10									
								11		12
			13				14			
15						16				

TIPLIN

- | | | | |
|----------------------------|-------|-----------------------------|-------|
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. _ _ _ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T _ _ _ lu | - (3) | 6. _ _ _ _ _ _ _ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa _ _ _ a | - (3) | 9. Küm kasa purtem | - (5) |
| 13. Ajungbena temulungjang | | 10. Tetsüng tajemetdak | - (6) |
| tongtonglatsü atu | - (5) | 12. _ _ _ _ adenshi | - (4) |
| 15. Tejen lai nung tesayur | - (5) | 14. Tsünüsenbongtsü adokdak | - (3) |
| 16. Tsüingsak-mopung | - (5) | | |

LANGTSÜNGLEN

- | | |
|-----------------------------|-------|
| 1. Reprangdaksü | - (4) |
| 2. _ _ _ ur | - (3) |
| 4. Kiojen yangludak | - (6) |
| 6. _ _ _ _ _ _ _ ait | - (7) |
| 7. Nagaland nung ayong ka | - (5) |
| 9. Küm kasa purtem | - (5) |
| 10. Tetsüng tajemetdak | - (6) |
| 12. _ _ _ _ _ adenshi | - (4) |
| 14. Tsünüsenbongtsü adokdak | - (3) |

OLONG PAITEP # 5682 TELANGZÜBA


TIPLÉN :

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.

LANGTSÜNGLEN :

1. Khu, 2. Sūjak, 3. Onūk, 4. Oba,
5. Anū, 6. Ratet, 7. Mozū, 8. Ita,
10. Tar, 12. Tinu, 14. Salem, 15. Aja,
18. Anūnū, 19. Tajū, 21. Ano, 22. Onū,
23. Kua.

Agüja aliba noksa nung meputepi aliba bushiang



TANÜBO NAI LANGZÜANG

- Q.** Zari production centre ya _____ yimti nung lir.
A. Bhopal B.Bhuwaneshwar
C. Kolkata D.None of the above

===== (Taruba adok nung onoki langzüsü)

YASHI ADOK TELANGZÜBA : Kerala

Tanur asoba anogo nung salem osang den noksa
angati adokdaktaktsünura - Tenüng, Küm, School,
Talidat & salem osang tejanga zülur, noksa
(photograph - any size) ka den anogo 3 mesüra 4
jelia e-mail : tiryimyim@gmail.com nung yokang
mesüra Tir Yimyim bureau tem nung agüjang.

Tepela
Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

INDIA NÜNG JENJANG TULU AKETBA AZÜ (DOG) METSÜ KAR:

1. Red Nose Pit Bull Terrier
Price in India: INR 75000-1500000
Origin: United Kingdom, Ireland
2. English Mastiff
Price in India: INR 500000-1000000
Origin: England
3. Tibetan mastiff
Price in India: INR 200000-500000
Origin: Tibet
4. Alaskan Malamute
Price in India: INR 200000-350000
Origin: Alaskan region
5. Newfoundland Dog
Price in India: INR 200000-350000
Origin: Coast of Newfoundland
6. Akita Inu
Price in India: INR 150000 - 400000
Origin: Japan
7. Afghan hound
Price in India: INR 150000-400000
Origin: Afghanistan, Iran, Pakistan
8. Boerboel
Price in India: INR 125000-225000
Origin: South Africa
9. Maltese Dog
Price in India: INR 50000-125000
Origin: Mediterranean Basin
10. Caucasian Mountain Shepherd Dog
Price in India: INR 150000-300000
Origin: Russia, Georgia, Armenia, Azerbaijan

SUDOKU # 5725

3	9		4		6				7	8	4	2	1	9	6	3	5
		7				3		2	2	9	3	6	7	5	8	1	4
		6	3	7		5			6	1	5	3	8	4	9	7	2
		3		4	9				8	2	1	7	5	6	3	4	9
7	6					4	5		9	3	6	1	4	2	5	8	7
9		4		6	7		1		5	4	7	8	9	3	2	6	1
1	5			3			2	6	4	6	8	9	2	7	1	5	3
4									3	7	2	5	6	1	4	9	8
		9			2		4	7	1	5	9	4	3	8	7	2	6

TELANGZUBA # 5724

OJANG LUTEP # 5272

[illegible]

OJANG LUTEP TELANGZÜBA # 5271

**YIMYIM AZÜNGERTEM TAKÜM TAJUNG NUNG TARUBA
KÜM AJURUTEPTSÜ YONGYA ATADI**



Dharamsala, January 03, 2021: Amongnü Dharamsala nung Tibetan Government-in-Exile Tir, Lobsang Sangay-i vote agütsütsü lia vote agütsüba temaitsü pa temerong nung rong tepdaksüba noksa nung angur.

India nung Covid vaccine melaba ajanga wara anema raratettsü: WHO

New Delhi, January 03 (Agencies): India linüki coronavirus vaccine amshitsü atema emergency use authorisation (EUA) agütsütsü telemetba agiba atema World Health Organisation (WHO)-i tenüngsang agütsü.

Amongnü WHO-i, India linüki vaccine amshitsü temelaba agütsüba ajanga coronavirus anema raraba tashi itshitsü, ta metetdaksü.

Amongnü Drugs Controller General of India (DCGI)-i linük nung emergency use atema Serum Institute of India (SII)-i yangluba Oxford Covid-19 vaccine- Covishield aser Bharat Biotech-i yangluba Covaxin vaccine temelaba agütsüogo.

Joko kobi melii taruba anogo ishika tsüngda coronavirus anema vaccine anaji amshi tenzütsü.

Regional director, WHO South-East Asia Region, Dr Poonam Khatri Singh-i, "WHO South-East Asia Region nung tang mezüng covid

vaccine amshitsü atema emergency use authorization (EUA) agütsüba atema WHO-i tenüngsang agütsü. Tanü India-i agiba telemetba ajanga region nung coronavirus wara anema raraba tashi itshitsü," ta metetdaksü.

Khetrapal-isa, wara ajemtsü atema shilem lemsar nüburtem nem vaccine agütsüba kanga tongtibang asütsü, ta metetdaksü.

Ato kilonser, Narendra Modi-ia, vaccine amshitsü atema temelaba agütsüba ajanga linük nung coronavirus anema raraba nung telemenshi adoktsü, ta metetdaksü.

Delhi Chief Minister, Arvind Kejriwal-ia, India nung yangluba vaccines amshitsü atema temelaba agütsüba ajanga linüki wara anema raraba nung yaritsü, ta metetdaksü.

Kejriwal-isa linük nung scientist tem aser doctor tem nem tenüngsang agütsü.

Kejriwal-i Hindi oshi agi twitter ajanga, "Linük senso

ajak nem tenüngsang agütsü. India nung yangluba vaccine ana amshitsü atema DCGI-i temelaba agütsüba ajanga linüki corona anema raraba nung yaritsü. Scientist tem aser doctor temi kanga meranga inyakba ajanga asenoki iba jenjang tongtetogo, parnok nem tenüngsang agütsü," ta metetdaksü.

Tesüiba ghonda 24 tsüngda India nung ano nisung 18,177 dak coronavirus tashidak putetba sülen linük nung coronavirus case ajak agibo 1,03,23,965 jungogo; iba nungjagi nisung 99,27,310 bo anepogo, ta Amongnü Union Health Ministry data ajanga metetdaksü.

Tang linük nung coronavirus tashidak agi teshirangdakpur 2,47,220 lir, aser ibaji coronavirus caseload nungi shilem 2.39 lir.

Tesüiba ghonda 24 tsüngda India nung nisung 217 coronavirus tashidak agi süogo, aser tang tashi nungbo iba tashidak agi asür ajak agi 1,49,435 jungogo.

Sorkari aluyimba ozüngtem agientsüla: Sonia Gandhi

New Delhi, January 03 (Agencies): Tang linük nung aluyimertemi longkak aitba atema Centre sorkar aija Amongnü Congress Tir, Sonia Gandhi-i, linük nüchiso anguba sülen tang mezüng tekong merangba sorkari aluyimertem timtem mangur, ta aitsü.

Lai Hindia oshi nung sangdong ka ajanga, democracy linük ka nung sorkartem aser lenirtemi nübur ola mangara iba sorkarji mapang talangka malitsü, iba denji külemi tang longkak aitba aluyimertemi Centre sorkar matsüngdang mapudaksü, ibaji tejangja, ta metetdaksü.

"Ano mapang lir, anungji Modi-i aniba sorkari tekong memerangtsüla aser aluyimertem longkak aitba anentsü atema tangsa ozüng tanak asemprongla agientsüla," ta lai ashi.

Democracy tetezü nüburtem aser aluyimertem taginüba kümzükbä lir, ta Modi sorkari mamadoktsüla, ta laisa ashi.

"Tang temekong mapang tzünglu agi ajaba-a arema tesüiba anogo 39 tashi Delhi arrtsülen longkak aiter aluyimertem tia ngua linük sensotem den külemi ni-a jashir

aser parnoki akhangba pusemer," ta Sonia Gandhi-i metetdaksü.

Sorkari aluyimertem ola mangaba agi tang tashi nung aluyimer 50 dak tema süogo aser maneni karibo soseta asütsü bilemer, ta lai ashi.

"Ajisüaka taochi makaba Modi sorkar dang masü saka Ato kilonser, mesüra minister tem rongnungia kati danga temelung süneptsütsüsa kecha mejembir. Asür aluyimertem nem ni akhüm agütsü aser Tsüngremi parnok kibongtem mangyim jashi sünepjang ta ni sarasademtsür," ta Congress Tiri ashi.

"Linük nüchiso anguba sülen tang mezüng linük puti otsü nung tekong temerang sorkar ka lir, nüburtembo toktsür parnoki aluyimertem timtem-a mereprangteter," ta lai ashi.

Industrialists kar tajangzüik ngudaktsütsüji iba sorkar atema tongti onük kümogo, ta lai ashi.

Bodhbar tashi nung sorkar aser aluyimertem tsüngda senden trokben tashi menogo aser onük anabo lemtetogo saka ano onük ana- aluyimba ozüng asem agientsü aser minimum support price (MSP) onük atemabo telemetba magi.



January 03, 2021 nü Mumbai nung kou mejeper kati mask semer tangar kou mejeptsüba noksa nung angur. India nung coronavirus vaccine ana amshitsü atema Amongnü Drugs Controller General of India (DCGI)-i temelaba agütsüogo.

Ghaziabad nung ki chirepba lendong nung nisung 21 asü; 20 yiru



January 03, 2021 nü Ghaziabad (Uttar Pradesh) kübok Muradnagar nung tasü mang arongba leper ka nung ki chirepba sülen kümzükbä maparen inyakba noksa nung angur. Iba lendong nung nisung 21 asü aser nisung 20 yiruogo.

Ghaziabad, January 03 (Agencies): Amongnü Uttar Pradesh nung Ghaziabad kübok Muradnagar nung tasü mang arongba tesem nung semtu ki ka chirepba lendong nung nisung 21 asü aser nisung 20 shi yiruogo, ta police osang ka ajanga metetdaksü.

Nisung ka tenüng agi Jai Ram tasü mang rongdokba

mapang nung tzünglu aruba agi nisung aika iba kidangji jenoka lia kiji chirep; asürtem timbaka Jai Ram'er kinüngertem liasü.

Iba tatalokba sülen kümzükbä maparen inyaksü atema National Disaster Response Force (NDRF) team ka iba tesem jagi yoka liasü.

Iba dak alia iba lendong

nung yirur nisung 20 hospital balala nung yaridar, ta Amongnü nikongdang ketdangsertemi metetdaksü.

Iba osang angashia Uttar Pradesh Chief Minister, Yogi Adityanath-i mangyim jashi lemsatepogo aser asürtem kibong shia nem senotsü teyari lakh anana agütsütsü, ta sangdong.

Asaduddin Owaisi-i West Bengal semdang

Kolkata, January 03 (Agencies): West Bengal assembly election nung rangloker Amongnü All India Majlis-e-Ittehadul Muslimeen (AIMIM) tongti, Asaduddin Owaisi-i West Bengal kübok

Hooghly district semdangba sülen Muslim lenir, Abbas Siddiqui ajurua state nung yimtenren tensa aser taruba assembly election atema o lemtetogo.

Par party-i West Bengal assembly election nung tokteptsü, ta sangdongba sülen tang mezüng Owaisi-i state semdangogo.

Osangbener den jembidang AIMIM state secretary, Zameerul Hassan-i, "Owaisi-i iba sendenji mimshia liasü, kechiyong TMC sorkari pa airport nung nokdangtsüa akok ta ozü party-i arendaka liasü. Pa Kolkata airport nungi indang-indanga Hooghly-i oa Abbas

Siddiqui ajuru. Nikongdang pa Hyderabad-i meyipa aotsü," ta metetdakja liasü.

Tamasabo Owaisi-i video conferencing ajanga dang Siddiqui den senden amentsü sentong liasü saka pa melung melenshia pai tsüngdong oa Muslim lenir ajuru.

Futura Sharif nungi Muslim lenir, Siddiqui-i yimjak nung state sorkar aiben aija arudar, aser osang angazükba agi pai minority telok ka tentettsü sentong lir.

Yaküm Bihar assembly election nung Owaisi'er party-i menden pongu tashi nung takok anguba sülen Bengal election nunga tokteptsü telemetba agi. Par party-i Bengal election nung shilem agiba ajanga BJP ang jenjang jungdaksütsüa akok ta osang angazüker.

Menden 294 aliba West Bengal Assembly election ya taküm April-May nung agitsü.



Beijing, Aenjeti/Jan. 03 : China yimtiba, Beijing nung khen atema mozü agütsütsü yanglua aliba tesem ka nung nüburtemi COVID-19 mozü agitsü molunga form fill up asüba noksa nung angur. Beijing nung iba tashidak kanga mela menatepa aotsüpur nem mozü agütsü tenzüko. February 12 nungi tenzüksü aliba Spring Festival 2021 matongdang arishi küm 18 nungi 59 tsüngta nisung telok teku nem COVID-19 mozü agütsütsü.

Biden jenjang ajungtsü atema Georgiaelectoion akoktsüla

Cuthbert, Aenjeti/January 03 (Agencies): US Senate amokbangtsü aser iba den Tir inyaksü shimteta alisang Joe Biden sentong takok ngua inyaktetsü atema Georgia nung menden ana atema Mongulbarnü election agishiba nung Democrats temi takok angutsüla.

November 3 tir election nung Biden-i Tir Donald Trump madak takok anguba sülen kanga sashia nübu yimteper. Iba state nung yimten yimsüsür telok balala adenshia lir.

Democrat nungi Biden aser Republican nungi Trump nati iba tesem ya Hombarnü semdangtsü lir.

Mongulbarnü agiba election nung tang teinyakdak Republican senator David Perdue aser Kelly Loeffler nati takok ngutetra Senate nung par telok ya tera agi timba akumtsü aser Biden indang nükjidong tem magizüksü. Saka

Democratic telok nungi kati danga takok ngutetra telok anaprong kasa akumtsü, anungji Vice President atema shimteta alila Kamala Harris-i ken o ajak nung olepdang agütsütsü tashi temeden alitsü.

Democrat Jon Ossoff, shiba documentary film yanglur, pai Perdue den tokteptsü aser Atlanta nung aliba Black church Ebenezer Baptist Church nung senior pastor, Rev. Raphael Warnock-i Loeffler den tokteptsü.

November ita Georgia nung Biden-i tera agi akokba ya Democratic telok nungi tir atema tokteper asoshi takok mezüngbuba alitsü, aser Republican telok tashi ita aliba state ka nung temelenshi arur.

November ita election agiba mapang candidate katia vote shilem 50 mongutetba ajanga January 5 nü election ya agishitsüsa akum.

Election tentinü metongjung

otsüsüa ballot million asem bo agütsüo.

Democrats temi takok angutsü asoshi kanga tongtipang, sentsü tanak nisungtemi tang agüja aliba vote asemü kumer shilem ka agüja lir, koba November election nung agütsüba dang shilem 27 shi agi timba alitsü.

Biden-i Ossoff aser Warnock den külemi Atlanta nung Hombarnü nübuyimtsü aser Vice President inyaksü shimteta alila, Kamala Harris-i Savannah nung Deobarnü nübuyimtsü.

Hombarnü Trump-i Republican longsoa aliba Whitfield County semdangtsü saka pai kuli tejangja magütsüteti November 3 election nung ashikülak mapa inyakba ajanga takok mangu ta maneni jembiba ajanga Republican tem aika kimai mayazüksü akok, ta asadangteta lir.

Southwest Pakistan nung mijang ator 11 tepset

Quetta, Aenjeti/January 03 (Agencies): Southwest Balochistan province nung prangbong bena alirtemi kin tila Hazara Shia Muslim mijang ator telok ka pua bener aoba sülen injang khaloktsü, ta Pakistan ketdangser kati ashi.

Iba tesem ung police aser paramilitary ama inyaker Levies Force nungi ketdangsur, Moazzam Ali Jatoi-i ashiba agi, iba lendong ya provincial capital, Quetta anüdoklen kilometer 48 pilar Mach coalfield anasa Deobarnep atalok.

Jatoi-i ashiba agi, prangbong bena alirtemi mijang ator tem ya anasa aliba tenemleni anir ao aser yangji parnok dak injang khaloktsü. Iba tesem nung mijang ator trok asü aser ano nisung pongu kanga mejungi yirua mozükii bener aoba mapang lendang asü, ta pai ashi.

Jatoi-i ashiba agi, mezüng bushisüngdangba mapang lendong agütsürtemi Hazara

Shia kin nungi mijang ator tem ya jangjateta tepsettsü atema anir ao aser tanüngba nisungtem dang kecha mashi, ta putet.

Yangji television nunga sepaitemi tenemtsüng ka muketbanger garitem danga lenmangi yok aser tasü mang abeni ambulance tem anir aoba sayu. Lendong agütsürtem bushia sepaitem tenem leni aoba nguogo.

Telok katia iba lendong agütsüba tenüng agia mali saka taoba mapanga Sunni yimsü akhanga amshiba telok, Lashkar-e Jhangvi temi Balochistan province nung Hazara kin dak tenük yoker lendong balala agüja aru.

Quetta nung Hazara Shia Muslim nung 600,000 shi lir, aser parnok ya timba yimti nung tesem ana nung adenshia alir.

Parnok aliba tesem ana ya jara talang agi muketbanger yangji barbed wire inoka lir aser

checkpoint tem sepaitemi anüker.

Sepaitemi tenokdangba balala agütsüba ajanga parnok ya yimti nung alir ama alitsü makoker, ta parnoki mapang talangka nungi jembia arur, kechiaser parnok ya shishilempatsü mesüra tanurtem school-i yoktsü memelar.

Balochistan nung telungpur telok balala agi timtem agütsür, aser item rongnung Taliban densema lir, shirnoki Shia Muslim aser iba province atema nüjiso bushirtem dak tenük yoker.

Danga province tem nunga mapa inyaker, talisa China-i anir sen billion \$62 indoka project balala tenzüka nung inyaker dak lendong agütsüba ya tang tasen masü.

December 26 nunga prangbong bena alirtemi iba province kübok Harnia district nung security post ka maka sepai tenet tepseta liasü.

Iraq-i Chinese company ka nem totzü agütsütsü

Baghdad, Aenjeti/January 3 (Agencies): Iraq-i dollar billion aika alang totsü supply asütsü atema China nung company ka den tenangzüktepba yangluogo, ta Iraq indang official news agency sangdong ka ajanga metetdaksü.

SOMO koba ajanga Iraq indang petroleum exports achaayanger, iba telok yagi shishilembar aika rongnungi China nung company ka shima liasü, ta SOMO General Manager Alaa Al-Yasiri-i ashiba INA sangdong ka ajanga metetdaksü. INA-i company tenüng mesera Ato Kilonser Mustafa al-Kadhimi-i iba tenangzüktepba nung sign asü masü, iba indang osang magütsü, saka Bloomberg sangdong ka ajanga taoba ita ashiba agi, ZhenHua Oil Co. den tenangzüktepba yangluogo.

SOMO-i, küm pongu atema anogo nung totsü barrel 130,000 shi agütsütsü benok koba November ita shishilembarteri dangi yokba shiti nung shia lir. Parnoki tang totzü ayokba jenjang nung küm ka atema jelia sen agüja atatsü khangogo, koba USD billion 2 dak tema asütsü, ta Bloomberg-isa metetdaksü.

"Zero interest nung Iraq-i USD billion 2 nguogo. Europe aser China nung company tem tsüngda toktepogo aser China nung company-i kokogo," ta Al-Yasiri-i ashiba INA-i metetdaksü.

Jelia sen agütsütsü asoshi nangzüktepba ya Baghdad atema tang mezüngbuba asütsü aser iba ajanga China-i timtem nung aliba totzü ayokertem nem state kübok aliba company aser bank tem ajanga teyari agütsüba sayur.

Totzü export asürtem ajak coronavirus wara poktetba ajanga shishilembar nung kongshiogo aser March ita nungi jenjang raksaogo aser Iraq-a jenjang kanga mejungi lir. Saudi Arabia sülen OPEC-i totzü timtiba adokdaksür aser International Monetary Fund-i taoba küm parnok rongsenketsüng jenjang 11 agi tajemba akümtsü takzütsüo. Kasa mapang nung dollar den medemdangra December ita dinar shilem 20 agi tajemba aküm koba 2003 küm sülen tang tajemtiba asütsü.

Totzü supply asütsü maongka agütsüba ajanga shishilembar tem aika atsüa aru, ta ken o jangjaa alirtemi ashi. Tawa tenangzüktepba yangluba rongnung iba ya tulutiba rongnung ka asütsü aser iba ajanga takoker nem küm ka parnoki aginüba mapang totzü agitsü atema temelaba agütsür. Yimya agi Middle East nung adokba totzü ya taziükba kübok shishilembar aser shishilembar aser totzü asüngteta amshirtem nem tanga tesem nung totzü tanaben yokshitsü temelaba magütsür.

UK nung tenokdangba tali agütsütsü: PM Johnson

London, Aenjeti/January 3 (Agencies): British Ato Kilonser Boris Johnson-i Deobarnü, COVID-19 tashidak tali kümyonga aoer asünung tenokdangba tesashiba agütsütsü ana nung lir ta shiogo, saka school tembo kümzüka lir, aser tanurtem maneni school-i otettsü, ta ashi.

Britain nung COVID-19 tashidak menar aika kümogo aser tali renloka odor, koba tashidak tapu tasenba ajanga lir. Iba ajanga London aser temeket nung school tem tanaben lapokshitsü sentong aliba athitsüsa aküm.

England kübok tesem timbaka nung tashidak menatepyonga aoba nokdangtsü aser national healthcare system kümzüka ayutsü atema tenokdangba

tesashi agütsür lir.

BBC den sensaksemba mapang tang benoka aliba inyakyim ya tashidak aziüktsü atema teperi masütsü akoka ta tebilemstü kaa asüngdangba mapang Johnson-i, "tensa tamajungba akümtsü akok," ta ashi.

"Tenokdangba tesashiba agütsütsü atema onoki asadangshitsüsa akümtsü. Kechi jenjang agitsü iba indangbo ni jembia matali," ta pai ashi.

Johnson-isa, school tembo kümzüka lir ta shia tsürapurtem dang ozüng agi melaba tesemtem nungbo parnok tanurtem school-i yoktsü shiogo.

"School tem kümzüka lir ta ni temulung lema bilemer aser education ya ajak dang tongtubangba," ta pai ashi.



Migrant tem süng agi yangluba rong ka nung Libya nungi jena aoba sülen mile 110 shi orr Mediterranean tzüyim nung Spanish NGO, Open Arm nung inyakerteri kumzüka mapang tangokba noksa nung angur.

Nagaland police, NDRF, SDRF-i Dzukou Valley nung mi abentsü merangdar



Nagaland Chief Minister Advisor, Technical Education & Elections, Government of Nagaland, Medo Yokha den DC & SP Kohima, SDO Civil Jakhama, yimtsüngtem nungi lenirtem aser tangartemi January 2 nü Dzükou Valley semdangba mapang tangokba noksa nung angur. Parnoki Dzükou Valley nung morok aoba tsüngtong oa asadanga liasü.

Imphal, Aenjeti/January 3 (Agencies): Deputy Superintendent of police (South) Vitoshe K Sumi-i anir Kohima police team ka den Nagaland Armed Police (NAP), State Disaster Response Force (SDRF) aser National Disaster Response Force (NDRF) personnel tem Deobarnü Dzukou Valley nung morok mi den raratsü tonga tuogo

Nagaland forest department ketdangsertem aser Southern Angami Youth Organization (SAYO) volunteer temia valley nung morok mi abenba nung teyari agütsüdar.

Morok mi ya December 29 nü Nagaland tsütsü tenzük aser iba sülen Manipur tsütsülenia rongyonga ao.

Nagaland forest ketdangsertemi ashiba agi, morok ya Dzukou Valley south-western tsütsüleni rongyonga arudar aser mibenertemi iba tsütsülen nungi mi aben tenzüksü.

Nagaland chief minister advisor Medo Yokha den police officer aser yimtsüng balala nungi lenirtemi Honibarnü Dzukou Valley semdanga mibenba inyakyim asadangogo.

Manipur sorkaria Honibarnü mibenertem aser volunteer tem amshitsü atema helicopter ana agütsüogo.

Maneni Union home minister Amit Shah-i, valley nung morok mi temseptsü atema takokba tashi teyari agütsütsü nangzükogo.

Assam minister Siddhartha Bhattacharya-i scooter lemtsü

Mangaldai, Aenjeti/January 3 (Agencies): Assam law & Guwahati development department minister Siddhartha Bhattacharya-i, Deobarnü Darrang district kübok Mangaldai tesem nung scooter lemtsüba sentong nung temaba jenjang nung takok anguba tetsür kaketshir pongu nem scooter kaka agütsüogo.

Pragyan Bharati scheme indang Dr Banikanta Kakati Merit Award kübok taoba küm HS final tatidang nung first division nung tatidang angantetba tetsür kaketshir 908 nem two-wheelers kaka agütsütsü.

Assam sorkari iba scheme kübok temaba jenjang nung takok anguba tetsür kaketshir tem nem sen crore 144 intoka scooter 22,250 agütsütsü.

Kaketshirtem den o jembiba mapang Sidhartha Bhattacharya-i, "HS tatidang ya kaketshirtem atema tarutsü asoshi nükjidong ayutsü atema tatidangtem rongnung tongtibangtiba lir," ta ashi.

"Two-wheelers agütsüba ajanga tetsür kaketshirtem temaba jenjang nung kaket shisatsü bushiba mapang tashi aser senzüsenpong nung mapa intokba tajemba kümdakja teyari agütsütsüba dang masü saka iba ajanga tarutsü nung HS tatidang nung takok tajung angutsü atema kaketshirtem ajungmesotsü imlar," ta paisa ashi.

Kasa mapang nung Mangaldai Lok sabha MP Dilip Saikia-i, centre nung Ato Kilonser Narendra Modi-i aniba sorkar aser Assam sorkari tetsürtem ajungkettsü atema temulung agüja inyakba tutea ashiba den, iba scheme ya kasa nükjidong nung atema amenok, ta ashi.

Saikia-isa, scooter lemzükba kaketshir aser tsürapurtem dang iba scooter ya kodanga mayoktsü ashi.

Maneni Mangaldai legislator Gurujyoti Das-i, beneficiaries tem dang license agizüktsü aser helmet semer traffic temzüng ozüng sülen tashi angaa iba scooter anishitsü ajungshi.



DC Dimapur Rajesh Soundararajan IAS den administrative officers aser health officials temi January 2 nü Urban PHC, Duncan Bosti nung Covid 19 vaccine dry run asadangba sülen tangokba noksa nung angur.

MISSIONARY TESAYUR NÜNGDAKER

Dimapur Ao Baptist Arogo Plain Karbi Mission Field nung Plain Karbi Mission English School atema Missionary Tesayur asem i.e. Graduate Tesayur ana aser Warden ka nüngdaker. Anungji, tejangrar nübu-i teküpoklen agüja aliba criteria nung application den ne indang documents aser CV arogo office 30th January 2021 tashi nung agütsütsü mepishia metetdaksür.

Sl. No.	Post Vacancy	No. of Vacancy	Minimum Qualification
1.	English Tesayur	1	Graduate (Preferably English Hons)
2.	Science	1	B. Sc.
3.	Warden (Boys Hostel)	1	Class 12 Preferably Theologian

Temetettsü kar lira, Mission Director den tongteprateptsü metetdaksür.

Contact No: Mr. Imnatoshi Longkumer +919436003553

Sd/-
REV. I. WATI
PASTOR,
Dimapur Ao Baptist Arogo

Arunachal Pradesh Angh-i CM Pema Khandu den sensak asem

Itanagar, Aenjeti/January 3 (Agencies): Arunachal Pradesh Angh Brig (Retd) BD Mishra-i, Changlang district nung Miao-Vijonagar lenmang kanga meyilongi yangluba aser inyakyim dak temulung masüba lemsatepogo.

Honibarnü Raj Bhawan nung Chief Minister Pema Khandu den senden amenba mapang Angh-i, Covid-19 wara poktetba ajanga state nung project balala bangdaka alibatem takaratiba nung inyakyonga aotsü shiogo.

Angh aser chief minister nati nüburtem kümzüka ayutsü atema Covid-19 inyakyimtem ajang ajanga benoktsü sensaksema liasü.

Itanagar nung NH415 road project temabanga inyakba nung bendanga agüja inyakba atema Khandu nem tenünsang agütsüba den Angh-i state yimtiba merckmejua ayutsü atema inyakyim tapet benoktsü ayongzüka liasü.

Paisa, Itanagar ya India nung Smart City tem rongnung ka asütsü shimogo, anungji merckmeju, health & hygiene, facility centres, internet aser lenmang ajanga tesendaktep dak sendakba nung tatishitsü tajungtiba agütsüba yimti asütsüla, ta ashi

Angh-isa, Covid-19 vaccination sentong tetsükdaksü makai inyaka otettsü atema sentong tapet ka yanglutsü benoka liasü.

"Standard operating procedure dak ajemdaker yakbang nung inyaktertem nem tama agütsütsüla," ta Mishra-i ashi. Paisa, agriculture-horticulture aser allied sectors; talisa apiculture aser saisapong tsütsü temulung agüja inyaka mapa tali adokdaksütsü aser state nung temzüng ozüng tashi taitba küma yanglushitsü ayongzü.

Kasa mapang nung Khandu-i, state sorkar sentong aser ken o balala indang Angh nem metetdaksü.

Senden nungsa lenmang ajanga tesendaktep, tatidangtem, mapa tazüing aliba süngdaksüba, environment and forests, health, education aser Panchayat election amala onüktem benoka sensaksemogo.

Vivo Y20A India nung ayok tenzükogo

Aenjeti/January 3, 2020 (Agencies): Vivo company-i India nung yangluba Vivo Y20A iba hopta tetenzüklen sayaogo. Vivo Y20A ya tang India nung shishilembadak ayok tenzükogo. Vivo Y20A ya Vivo Y20 watered down version ka lir kong 5,000mAh battery aser 64GB onboard storage keta aliba angutsü.

India nung iba variant kija ya ayoktsü koba sen 11,490 agi angutsü. Vivo Y20A nung Android 11-based FunTouchOS 11 inokja lir.

Vivo Y20A ya India nung Dawn White aser Nebula Blue sentsü nung sayaogo. Iba smartphone ya India nung Vivo online store nungbo yokdar aser mapang tatsüka tsüngda online aser offline retailers tongtibang ajak nung angutsü imlar.

Phone alirtemi Vivo online store nung Vivo Y20A ya exchange discounts aser no-cost EMI options amshia alitettsü. Vivo Y20A nung 6.51-inch HD+ IPS display den 20:9 aspect ratio keta lir. Maneni phone nung octa-core Qualcomm Snapdragon 439 SoC inokja lir aser iba den 3GB RAM aser 64GB internal storage keta lir.

Vivo Y20A ya India nung 3GB RAM + 64GB internal storage variant dang sayaa lir.

Camera tsütsü Vivo Y20A nung triple rear camera setup ka keta lir, kong 13-megapixel main camera ka, 2-megapixel depth sensor ka aser 2-megapixel macro lens ka inokja aliba angutsü. Phone tejaklen selfie agitsü atema 8-megapixel camera ka keta lir.

Connectivity options tem rongnung 4G LTE, Wi-Fi, Bluetooth 4.2, GPS/ A-GPS, FM radio, micro USD, aser 3.5mm headphone jack ka densema aliba angutsü. Iba smartphone nung tezülen fingerprint scanner aser storage atsülanga amshitsü atema microSD card slot ka inokja lir.

Maneni Vivo Y20A nung 5,000mAh battery den 10W fast charging keta aliba angutsü.

India tetsür hockey team Argentina tour atema ayamesoa ogo



New Delhi, Aenjeti/January 03, 2021 (Agencies): Argentina tour atema Deobarnü (03.01.2020) Captain Rani Rampal-i anir India tetsür hockey team ayamesoa ogo. Alima ajunga asüngba COVID-19 wara tenokdangba ajanga kum ka jungnua hockey asayamung ka danga masayaba sülen, tang iba international asayamung nung India tetsür team-i tanaben shilem agiba angutsü.

Iba tesashi wara ajanga international tetoktepba asayamung balala thinenja aruba asadangteta India team pur ita aika atema Bengaluru Sports Authority of India centre nung training agia liasü.

January 26, 28, 30, 31 - anogo pezü tashi India tetsür team-i world no. 2 team Argentina den asaya pezü nung tokteptsü asoshi renema lir. Iba asayamung metenzükdang, India tetsür team-i Argentina indang junior aser B team den asayatsü.

"Tanaben tour nung shilem agitsü asoshi maongka angudang pelaseter aser jangratemer. Iba asayamung atema tesüiba ita ishika tejakdang nungi onoki meranga training agia aruogo aser iba maparen international asayamung ka nung sayutsü asoshi mapang agi sempettsüogo," ta Deobarnü team ayamesoa maodang captain Rani-i ashi.

"Onok ajak bio bubble nung amungtsü asünung tan international asayatem taoba dang nungi tera balaka alitsü, ajisüaka team-i parnok dak aketba sempet tajungtiba amhsia shilem agitsü asoshi yongyadar," ta lai ashi.

Team anaprongla atema Hockey India aser asayamung ayonger (Argentina) national association nati bio bubble renemtsüogo.

India team Argentina tonger sülen, parnok ajak hotel ka nung

anenzüksü, kong chiyongtsü, team senden aser session tem atema takdang balala agütsütsü.

Team ayamesoa maodang ghonda 72 tejakdang team nung züngsem ajunga COVID-19 RT-PCR test agiogo.

Argentina tongli, India tetsür team pur quarantine nung makazü/mamung yongjia, India aser Argentina sorkar ajanga latetta yutsüba/tuyuba temzüng nung team ajaki anidaktsüsa akumtsü, ta sangdong ka ajanga metetdaksü.

Argentina tour takok ngua ayongzüksüba atema India indang vice-captain aser goalkeeper Savita-i Hockey India aser SAI naprongla dang pelaba metetdaksüogo.

"Taruba Olympics atema renemshitsü asoshi mapang peria mali asünung tetoktepba asayamung nung tanaben asaya tenzüksütsü asoshi onoki nüngdaka liasü. Practice session tem nung onoki temulung lema renemogo, saka saisaponger ka sempet tendangtsü atema international asayamung ya tongtibang lir," ta Savita-i ashi.

"Iba asayamung ajanga team tsüngda ano temelenshi tajung adoktsü asoshi onoki imlaa atar aser iba asayamung mezüng asaya nungi tenzüka onoki tajungtiba nung shilem agitsü temulungtetba tulu lir," ta lai shisem.

Mushtaq Ali T20: Mumbai squad nung Arjun Tendulkar aniok



Mumbai, Aenjeti/January 03, 2021 (Agencies): Syed Mushtaq Ali T20 Trophy indang League stage atema, Honibarnü fast bowler Arjun Tendulkar aser seamer Krutik Hanagavadi naprongla Mumbai squad nung aniokogo.

Arjun ya Cricket asaya tsütsü batsman mongin Sachin Tendulkar'er jabaso lir. Covid-19 wara ajanga nokdanga aruba domestic asayamung ya January 07, 2021 nü nungi tenzüksü terenemba lir.

Mumbai ya Group E nung Delhi, Haryana, Kerala, Andhra aser Puducherry team rongnung dena lir. Iba telok January 11, 13, 15, 17 aser 19 nü asayatsü. Iba sülen knockout asayatem Ahmedabad yimti nung ayonga

asayatsü.

"Asayamung nung shilem agitsüpur asayar ajak bio-bubble telungtet nung alitsüla, aser net nung bowler tem den asayatem melentsü asoshi tanga nungi asayar jaoktsü memelar asünung, tesuiba anogo asem tejakdang, BCCI ajanga team ajak dang asayar 22 shimtsü asoshi temelaba agütsü. Iba dak sendakba nung Mumbai squad atema Arjun aser Hanagavadi naprongla züngsem 21buba aser 22buba ama bendenlok," ta Mumbai Cricket Association (MCA) sangdong ka ajanga metedaksü.

Taoba mapang, India under-19 team aser kum telemsa team balala atema Mumbai tenüng nungi Arjun-i asayaogo.

Mumbai team nung tia makai India batsman Shreyas Iyer-i masayatetsü. Tawa tembangba Australia tour nung Shreyas tapubang yiruba ajanga, pai team pur den külemi iba asayamung nung shilem magitetsüsa akümer.

Salil Ankola-i aniba selection committee tasen ajanga team atema Suryakumar Yadav captain ama shimogo, koba January 11, 2021 nü nungi tenzüka Mumbai nung team pur league asaya ajunga asayatsü. Yadav den yarisemtsü atema wicketkeeper Aditya Tare vice captain ama inyaktsü.

Deobarnü, asayamung nung shilem agitsüpur team ajunga pei pei asaya telemsa yimti kübok bio-bubble nung denogo.

Mumbai team nungi Suryakumar Yadav (captain), Aditya Tare (vice captain), Yashasvi Jaiswal, Aakarshit Gomei, Sarfaraz Khan, Siddhesh Lad, Shivam Dube, Shubham Ranjane, Sujit Nayak, Sairaj Patil, Tushar Deshpande, Dhawal Kulkarni, Minad Manjrekar, Prathamesh Dake, Atharva Ankolekar, Shashank Attarde, Shams Mulani, Hardik Tamore, Akash Parkar, Sufiyan Shaikh, Arjun Tendulkar aser Krutik Hanagavadi nungeri shilem agitsü.

3rd SUPONGMEREN MEMORIAL VOLLEYBALL TROPHY

Venue : Molungkimong, Dist : Mokokchung

Date : January 14-15, 2021.

Prizes : Champion - Rs. 50,000 with Trophy & Certificate
Runners Up - Rs. 30,000 with Trophy & Certificate
3rd Place - Rs. 20,000 with Certificate
Individual Prizes : Best Spiker, Best Setter, Best Disciplined Team etc...

- Entry Fee: Rs. 2,000 (per team) -

Last Date of Form Submission : January 5, 2021

(P. Imti Aier)
Convenor, SMVT
9383014469

Momota dak Covid-19 putet

Tokyo, Aenjeti/January 03, 2021 (Agencies): Deobarnü, Badminton world no. 1 - Japan nunger Kento Momota dak Covid-19 tashidak putetba ajanga, tan ita nungi tenzüksü aliba Thailand Open asayamung nungi Japan indang asayar ajak tukadoktsüsa akümer, ta Japan Badminton Association sangdong ka ajanga metedaksü.

"Momota dak coronavirus tashidak tejangja putetogo aser iba asayamung atema Momota densema asayar ka danga Thailand-i meyoktsü asoshi association-i lemtetogo," ta association nung ketdangsür kati ashi.

Gari lendong nung kanga dang mejungi yirur kum ka tashi anepalua arur sülen Bangkok yimti kübok Momota-i tanaben international asayamung nung shilem agitsü asoshi renemer liasü.

National broadcaster NHK-i ashiba agi, Thailand Open atema Japan team ayamesoa aotsü aliba tejakdang Narita airport nung arishi kum 26 tain Momota dak coronavirus tashidak positive putet. Association nung ketdangsür ka ajanga, Momota dak alaka

Japan team nung asayar 22 rongnung ka danga iba tashidak aliba meputet, saka iba asayamung nung team-i shilem magitsü, ta osang jangjatsüogo.

Taoba hopta Momota-i All-Japan championships asayamung takok anguba ajaki jangjaa lir. Pa dak lendong ataloker sülen, iba asayamung nung mezüng shilem agia liasü. Taoba kum January ita Momota-i Malaysia Masters asayamung nung takok anguba sülen, gari nung mener airport-i aoba mapang lendong ajuru, kong pa kanga mejungi yiru aser gari anisang iba lendong nung takum sama.

Iba lendong nung Momota tenük anasa yiruba sülen, pai kodanga badminton masayatetsü ta tsübuseta bilem aser surgery agiba sülen pai asayatsü mejangraba lemsatapa liasü.

Tan ita Thailand nung ayonga asayatsü aliba badminton asayamung asem rongnung Thailand Open ya ka alitsü. Taoba kum Covid-19 tenokdangba ajanga item asayamung thinenja aser anogo atsülangja arur sülen, takum item asayamung ayongzüksü terenemba lir.

NBA: Paul Westphal alima nungi pilaogo

Los Angeles, Aenjeti/January 03, 2021 (Agencies): Basketball Hall of Fame asayar aser NBA coach Paul Westphal, ita ishika tekolok cancer agi timtema aruba sülen, Honibarnü (02.01.2021) pa alima nungi pilaogo. Pa arishi kum 70 liasü, ta Phoenix Suns sangdong ka ajanga metetdaksü.

Pungoben NBA All-Star aser taoba mapang "first-round pick" Paul-i 1975 kum Suns nung madandang pa indang career tetenzüklen 1974 kum Boston Celtics den pai NBA championship takok angu. Kum ka sülen, pa lenisüba kübok Phoenix pur mezüng NBA Finals nung shilem agiogo aser team den season trok dak tema nung pai point 20.6 tashi ajanzükteta liasü.

Asaya nungi anenba sülen, Paul-i mezüng Suns nung teyarir (assistant) ka ama inyak tenzüksü aser iba sülen pai head coach inyak, kong pai anir 1993 kum Suns pur NBA Finals nung shilem agi, saka Michael Jordan'er telok - Chicago Bulls-i parnok tsükdaksü.

"Basketball saisapong tsütsü Westy-i shilem tajung agiba dang masü, saka pai takum azüoka junga litetogo aser pai tangar dang

temeim sayua yariba asoshi, ajaki pa menungra bilemtetsü," ta Suns-i ashi.

Taoba mapang Suns kibur Jerry Colangelo-i ashiba agi, Westphal ama Suns nung inyaka aser temelenshi tulu adoktsür nübo tajung aikabo mali.

"Pai asaya nung shilem magidang, tanga maparen nung Paul ya akhüm taket nübo ka liasü, kibong asoshi pai nendaka ochishia inyak aser pa jakla yimya tajung liasü. Franchise-i aginüba ama, pai Suns atema bendanga agütsür inyakogo," ta Colangelo-i ashi.

Asaya shia nung Westphal-i average point 15.6 aser pa indang career mapang assist point 4.4 ajanzüktet.

2019 kum Basketball Hall of Fame nung asayar ka ama Paul mezüngokdang, pai Dallas Mavericks, Sacramento Kings aser Brooklyn Nets atema coach inyakogo.

NBA Commissioner Adam Silver-i, "Paul ya all-around asayar tajung ka liasü," ta ashi.

"Iba asaya meimba, mulungso aser lennir tajung ka ama takum litetba atema ajaki pa bilemtetsü," ta Silver-i lemsatap.

BILEMDANGANG

"Kechi komaka takümüji melenshia lidangyonga, tamajungerbo tamajungersa asür."